

**MESYUARAT KEDUA PENGGAL KEEMPAT
DEWAN UNDANGAN NEGERI PULAU PINANG
YANG KEEMPAT BELAS
26 NOVEMBER 2021**

PERKARA : 4(A)9

**SOALAN LISAN OLEH AHLI KAWASAN KEBUN BUNGA
YB. ONG KHAN LEE**

9. Realiti/keadaan kemiskinan bandar (urban poverty) amat serius, bagaimanakah Kerajaan Negeri akan menambah baik serta kaji semula dasar pembasmian kemiskinan sedia ada dan lalu menetapkan satu tempoh pencapaian kemiskinan sifar?

**YB. PROF. DR. P. RAMASAMY A/L PALANISAMY
MENJAWAB BAGI PIHAK Y.A.B. KETUA MENTERI**

9. Kemiskinan bandar merupakan keadaan di mana seseorang individu atau sesebuah isi rumah yang tinggal di kawasan bandar adalah miskin daripada segi kewangan dan ketinggalan dalam pelbagai aspek lain merangkumi kesihatan, pendidikan dan taraf kehidupan. Keadaan kemiskinan ini boleh berlaku disebabkan punca-punca berikut:

- (i) Migrasi penduduk luar bandar dengan tahap pendidikan yang rendah ke bandar menyebabkan mereka gagal mendapatkan pekerjaan yang mampu memberikan pendapatan yang melebihi keperluan di bandar;

- (ii) Saiz isi rumah memainkan peranan yang penting dalam faktor kemiskinan bandar di mana keperluan isi rumah tidak dapat dipenuhi kerana hanya beberapa ahli keluarga sahaja yang bekerja;
- (iii) Keadaan ekonomi yang tidak menentu menyebabkan pengangguran dan pemberhentian kerja serta meningkatkan kadar pengangguran dalam kalangan penduduk bandar; dan
- (iv) Tindakan majikan mengupah pekerja asing yang jauh lebih murah daripada penduduk tempatan menyebabkan penduduk bandar tidak dapat bersaing dalam pasaran kerja.

Dasar dan strategi Kerajaan Negeri dalam usaha membasmi kemiskinan adalah melalui lima (5) Jawatankuasa Pembasmian Kemiskinan Daerah di mana setiap Ahli Dewan Undangan Negeri (ADUN) merupakan ahli jawatankuasa tersebut. Mesyuarat jawatankuasa tersebut diadakan pada setiap bulan bagi tujuan

penyelarasan bantuan oleh pelbagai agensi dan Badan Bukan Kerajaan (NGO) kepada pihak yang memerlukan. Sebarang cadangan berkaitan usaha pembasmian kemiskinan akan dipertimbangkan melalui mesyuarat ini. Hal ini kerana Kerajaan Negeri telah menurunkan kuasa kepada Jawatankuasa Pembasmian Kemiskinan yang dipengerusikan oleh Pegawai Daerah untuk membuat sebarang keputusan berkaitan pemberian bantuan atau hal-hal berkaitan selepas siasatan ke atas individu yang terlibat untuk disenaraikan sebagai miskin bandar.

Berkaitannya, sejumlah 373 Majlis Pengurusan Komuniti Kampung (MPKK) dan 40 Jawatankuasa Pembangunan Wanita dan Keluarga telah ditubuhkan di seluruh Negeri Pulau Pinang sebagai perantara dalam sistem penyampaian awam (*Public Delivery System*) untuk memberi laporan kepada ADUN untuk membawa sebarang isu kemiskinan dan isu berkaitannya sewaktu Mesyuarat Pembasmian Kemiskinan Daerah.

Sasaran yang ditetapkan untuk mengeluarkan seseorang individu daripada kemiskinan adalah dalam tempoh dua (2)

tahun. Walau bagaimanapun, keadaan ini tertakluk kepada keadaan semasa, misalnya pandemik COVID-19 yang telah memberi kesan kepada keadaan ekonomi seseorang Individu tersebut.